

四庫全書

集部

欽定四庫全書

集部  
蓮洋詩鈔卷一

詳校官侍讀<sub>臣</sub>陳崇本

助教<sub>臣</sub>常循履勘

總校官原任中允<sub>臣</sub>王燕緒

校對官檢討<sub>臣</sub>李學錦

謄錄監生<sub>臣</sub>柴汝誠

欽定四庫全書

集部七

蓮洋詩鈔

別集類六

國朝

提要

臣等謹案蓮洋詩鈔十卷

國朝吳雯撰雯字天章本遼陽人順治六年其父允升任蒲州學正卒于官雯兄弟孤弱不能歸遂為蒲州人康熙己未薦舉博學鴻詞不中選其卒也刑部尚書王士禎為誌其墓

稱初見其詩有泉繞漢祠外雪明秦樹根濃  
雲濕西嶺春泥沾條桑至今堯峯上猶見堯  
時日諸句吟諷不絕于口所作居易錄中又  
亟稱震西城別墅諸篇趙執信懷舊詩序亦  
稱震拙于時藝困躓場屋中體貌麤醜衣冠  
垢敝或經歲不盥浴人咸笑之然詩才特超  
妙其詩一刻于吳中再刻于都下三刻于津  
門後士禎為刪定存千餘首亦見墓誌中因

燮沒之後未及刊行故懷舊詩序曰蓮洋卒  
後阮翁為作墓誌且刪定其集迄今將二十  
年未行于世意其時阮翁耄而多忘未幾遂  
沒未及歸諸吳氏耶池北書庫散失殆盡蓮  
洋集從可知矣云云然其集實已歸吳氏乾  
隆辛未汾陽劉組曾裒其全稿刻之又以士  
禎所評者別刊一小冊並行越十三年甲申  
山東孫諤官蒲州府同知始從燮姪敦厚得

士禎所定原本簡汰重刊詳載士禎之評併以劉本所遺者補刻于後復以所見墨迹補之其士禎所刪而劉本誤刻者咸為汰去凡得古詩二卷近體五卷補遺一卷詩遺一卷文一卷冠以墓誌而附以同時唱和題詠之作即此本也雯天才雄駿其詩有其鄉人元好問之遺風惟熟于梵典好拉雜堆砌釋氏故實是其所短劉本所刻無所持擇頗傷冗

濫此本沿新城之派又以神韻婉約為宗一切激昂沈著之作多見屏斥反以鄰于清弱亦不足盡其所長然終較劉本為簡潔故置彼錄此至其所載士禎評語繁碎特甚如題汪玉輪看劍圖詩下附記云原本評語奇作二字似阮亭先生筆跡胸有造化四字非阮亭先生筆跡刻本併作一處誤又如城曲眺望詩下附記云原本題下有墨筆評劉長卿

之詩也不知何人評阮亭先生改作絕似劉  
長卿云云此亦何關宏旨而字句異同乃如  
是其珍重之今悉刪除以廓清耳目焉乾隆  
四十四年四月恭校上

總纂官臣紀昀臣陸錫熊臣孫士毅

總校官臣陸費墀



蓮洋詩鈔原序

河中為郡當兩戒之首形勝冠寓中記稱太華中條本  
為一山巨靈顛履掌華蹈襄開為二以通河流禹貢之  
壺口雷首龍門華陰正當其處古秦晉之交也中條之  
南有地曰永樂唐詩人玉溪生故居在焉水經云河水  
又東永樂澗水注之注謂渠豬之水即其地也經又云  
河水又東北玉澗水注之注謂水南出玉溪義山自號  
蓋取諸此吳生家永樂讀書奉母耕牧河山之陽家苦

貧數數出游走燕趙齊魯梁宋吳越之墟所至與其仁  
賢遊處歸而有詩數百篇古澹閱肆得古作者精意而  
自成一家之言灼然可傳於後者也昔在丁戊間生來  
京師余肱其篋得蠹簡數十番讀而駭歎謂非流俗所  
應有以示劉吏部汪戶部梁侍御三君方枋文章海內  
其駭歎復不減予今十餘年矣比生再入京師則三君  
者皆解官歸卧或十餘年或七八年而吏部又前歿昔  
之與生遊相知者獨余在耳相與追道往事太息感慨

至於泣下嗚呼以生之才挾其文藝遊於四方歷十餘年而所號為知己者無過予輩四三人不數年間皆散去或且化為異物久矣豈不重可感哉於是予名之飲酒既酣復肱其篋則其詩雷硠劃豁又過於昔予讀之河傾燈灺不知止惜乎三君子不在不獲與之矜賞如曩時也會

天子下詔求博聞之士備

顧問著作於是謝比部方山以生名應

詔或以為生與司馬子長生同里又同遠遊其才皆不世  
出蓋河山之氣融結於千歲之久宜其先後相望無愧  
色是固然矣然子長生逢武帝右文不免戮辱發憤述  
史記生遭遇休明以布衣之賤一日名達

黼  
宸行且荷橐籥筆立第二螭坳之下曾何子長之足云  
又況義山白首幕府名不挂朝籍者哉漁洋山人王士  
禎序

吳徵君天章墓誌銘

漢魏已來二千餘年間以詩名其家者衆矣顧所號為  
仙才者惟曹子建李太白蘇子瞻三人而已

本朝大一統閱六十載作者亦多矣余獨以仙才許蒲坂  
吳君此余之私言也亦天下之公言也君且死語弟霞  
曰吾平生知己無逾漁洋先生吾即死遺詩勿遽出必  
待先生剛定雖相望二千里而勿憚跋涉而往求焉且  
謁誌墓之文吾無憾矣余居田里聞君之訃為哀輓以

代楚些其末云已空文字障靜閱莊嚴劫何事勞結集  
猶煩大迦葉未幾而霞至將君遺命余詩若為之識然  
嗚呼異哉豈余與君精神感通雖越在二千里不以幽  
明間有如此耶既次其詩遂為其銘君諱震字天章其  
先遼陽人也父允升中順治二年順天鄉試六年

授蒲州學正十二年

賜同進士出身明年卒卒後次年吏部按籍銓授知臨潁  
縣君幼孤母朱氏有節操撫君及弟霞等皆成立遂籍

於蒲君姿秉殊絕嗜書如飲食又薄帖括以為不足為  
雖在諸生輒瀏覽羣籍自六經三史外先秦兩漢下逮  
六朝唐宋元明四部之書無弗習也旁及釋老內典秘  
笈皆鈎貫其旨趣含咀其英華而尤於五際六義有深  
嗜焉初僑居中條山南之永樂永樂唐縣也李石兄弟  
三相皆居之詩人李商隱義山亦居之號玉溪生玉溪  
者永樂水名也君少而食貧無以為養數游京師謁父  
執友年二十餘矣京師士大夫無知其詩者予一日過

同年榮工部洞門見其詩云泉遶漢祠外雪明秦樹根  
又云濃雲濕西嶺春泥霑條桑至今堯峰上猶見堯時  
日大異之曰此非今人之詩也吟諷不絕於口久之君  
再入京師一見談藝輒夜分不休如釋迦之有鷲子瀉  
山之有寂子相說以解不待往復扣擊君固以謂余一  
人知己如后山之於南豐也戊午己未間

天子詔徵博學宏詞之儒備

顧問特舉制科海內名士鱗集



闕下君在舉中顧獨耽寂守素不與他人走健僕囊巨軸  
宛顏低眉望門求知者競馳逐膠牢澹泊門有雀羅余  
以是益重之臨胸馮相國知君名以扇索其詩君大書  
二絕句答之其坦率如是卒以不過亦不悔也君游燕  
趙齊魯吳越秦楚足跡半天下而梁宋間詩尤工晚訪  
舊天津復與余相見京師時康熙辛巳君年將六十倦  
游矣君好友天下士士之名雅者亦皆援君自重所至  
縞紵贈答無虛日然君胸中涇渭不徇世俗毀譽涼燠

以為親踈故人亦樂就之所謂嵇叔夜土木形骸黃叔度汪汪如千頃陂者度幾似之平生好仙釋有空諸所有仰青雲睹白日之意情耽逸僕僕四方謀升斗以為甘旨之奉非其志也嘗買圃鄭谷之口有竹數百挺黃梅數十株橘三株中作草堂面雷首肘太華怡然自足將以終老而迄不得遂嗚呼其可悲也君詩一刻於吳中再刻於都下三刻於津門今未刻尚千餘篇余刪之不少貸所存皆卓然可傳蓋痛君彌留不忘誣諉之

意亦以報良友於地下云爾今

當宁右文士苟懷一藝朝躡芒屨而夕登館閣者何限君之名固已聞於

朝矣而終不遇窮老以死是尤可悲也君娶祁氏有子二人江蘭早卒崇厚州附學生亦前卒繼娶聶氏孫一逢源尚幼君卒以康熙四十三年甲申五月二十七日得年六十有一以康熙四十五年九月十一日葬姚溫阡君嘗以詩賦應制科故稱徵君銘曰

山河兩戒皆首河中重華舊都扶輿所鍾昔在唐賢摩

詰

王右丞祁人徙河中

允言

盧綸河中人

義山玉溪

李尚隱懷州人居永樂

表聖

王官

司空圖虞鄉人

有明名世首兩襄毅

楊公博王公崇古

勲名爛然

風騷未繼嶽嶽吳生崛起布衣身處菰蘆名動京師聲

滿天下尚謀升斗晚卜菟裘子真谷口惟君之詩疏越

朱絃後有知者移情成連神之往來河聲嶽色

君得古銅印刻

此四字脩竹梅花徵君攸宅

賜進士出身資政大夫原任

經筵講官刑部尚書前都察院掌院事左都御史新城年

家老友王士禎撰



欽定四庫全書

蓮洋詩鈔卷一

蒲州吳雯撰

五古

行行重行行

離亭送君去三里聞馬聲  
五里馬無跡十里雲樹平  
嗟彼雲樹繁不知人有情  
乾坤靜如掌萬里見君行

遙題王咸中石隴山房

積水浮九州東南益蕩潏人家半洲島蘿篠互蒙密具  
區我舊游石隴君棲逸至今堯峰上猶上堯時日窻外  
一湖明階前衆山出春風散巖花細雨溜崖窰仙靈每  
來往真儒間儔匹表聖具生壙維摩得文室泉聲四回  
抱嶺勢百萃律何日復羸糧為君訪衡泌

岱路中作

入山不五里景色淒以繁泉繞漢祠外雪明秦樹根狂  
飈晚藤落斜日溪禽喧悠悠游子心對之轉忘言時序



既以殊寧不感鄉園馬上重歎息帶暝投孤村

偶然作八首 錄四首

世事日紛紜智者不能料所以古聖哲信心在吾道堅  
執無委蛇寶珠溷泥淖光輝究難掩終古具靈照風雷  
亦偶然天心發忠孝篤信德之基勿使前人笑

農夫何辛苦畊穫霜露間蠶女守桑筐一裙常不完嗟  
我纔知書坐食衣有綿天心豈見私遭逢或偶然苟不  
宗令德是謂褻冥頑讀史皆上口玩物喪本原組織月

露辭及物輸一錢何以報元化勉哉當體乾

衛足亦有葵比根亦有萑苟能慎道義何至墮險惡人  
生日詭隨趨避反成錯君子信固然天命有餘樂

言行動天地擬議居其先因之成變化聖人皆勉然率  
意即為妄師心亦多偏良金須就冶質美形乃全江海  
苟無則終古悲狂瀾布帛固有幅室慙垂至言竒氣尚  
收斂英雄歸大賢

雜咏二首 錄一首

讀書一萬卷寸衷轉茫昧將無昔人心翻在語言外聞  
見苦不多因貪反成害束書坐林間颯颯聞天籟

東陳說巖先生

昨從太行來曾過先生舍高松垂女蘿空山一繫馬京  
洛勞問訊陶陶樂情話身棲魏闕邊心在白雲下

寄巢薇先生

泰山何其高滄海何其深我翁具偉抱高據閱風岑鳴  
佩入天閭紫雲盪衣襟宇宙感太和喈喈鳳凰音蒼生

引領望薄海，靈祥霖緊余。瓠落久徒傷，年髻侵冰霜。歷  
亘寒幸托喬木，陰梧桐有繁枝。竹實比兼金，幾時敦行  
葦兼聆卷阿吟。

陽山

落日山風吹長松，亂清影白雲。逗殘雪忽見前峰暝，野  
鳥下寒竹孤僧汲。修綆聊欲遂幽尋，理策渡西嶺。

暮春雨中阮亭先生招同諸公集善果寺得曲字

古寺城西隅，寺路直還曲。幽人此來往，漸與山僧熟。煮

茗石幢下石鼎輕烟覆一花餘春榮衆陰長夏綠松深  
鶴唳靜竹動鳥飛速人生一世間光景如轉燭宇宙曠  
無垠何為自刺促勝侶欣招邀佳時值休沐名香風過  
院仙梵雨垂屋向晚孤霞明白雲傍簷宿蒼蒼林月上  
世界明金粟歸途重回首遥山寄遐矚

題張杞園浮家泛宅圖

海氣何茫茫海風猶浩浩日上瑯琊臺孤霞在雲表常  
慕羽人都滄波肆幽討塵羈未得去屢負蒼蒼島之子

水仙侶浮家謝機巧載書滿船頭雙鬟更娟好似戀鰕  
魚肥繫纜近芳草風檣白鷺過雨舵垂楊掃何不便颯  
然竟訪成連道帆行鼉鼉上青俯齊魯小世外見桃花  
千春不知老

集阮亭先生宅得秉字

冥冥花枝晚寥寥天宇靜清言喜忘倦坐失春宵永風  
過堦草翻月動巢鶴醒蘭烟方熟案麝火恰明鼎醉墮  
席上杯渴憶山中井京洛去復來豈曰違夙秉願言晤

親串聊取暢孤迴勞勞慕石隱買田不盈頃空泛洞庭  
波積雨愁舴艋山鬼頗便娟女蘿太幽冷人生分有定  
利鈍敢強騁早聞椎與槌幽薊別汝潁緣隨雙象馬夢  
謝頭細餅物情蒼狗態世事孤鴻影倘未早識別無乃  
昧要領家門青蓮花嶽嶽插青冥吾將掃石壇坐卧南  
峰頂

黃湄先生游太華山遂得結屋地賦贈

車箱谷口雲白照松間路誰能訪叔卿巖竇一身度黃

門具竒情振策御風步萬仞入洪濛理勝境無怖壑轉  
晦明錯樹老丹青誤俯見蒼蒼原明河正東注驟雨忽  
翻瀑肘腋蛟螭怒須臾互長虹關陝半呈露逕側脩竹  
倒石迸垂藤護相逢紫烟客目擊道皆寓齋房肉芝香  
石困松花聚卜居志已得探幽坐成趣嗟我生勞勞入  
世每多懼夢繫毛女壇身遠將軍樹日日對晴蓮塵容  
自生妒何年便結隣同住雲生處

西山詩



會宿

小山叢桂多石路晚尤曲為有看山約且共花間宿清  
言轉忘倦惟恐更漏促山鬼緣女蘿中夜媚幽獨傍曉  
望城闕微雨淡如沐黛色從西來青光繞茅屋把臂共  
欣然林風托遐矚

出郭

微雨既以過明霞互深淺出郭耳目易場圃紛在眼  
轆轤聲啞軋牽牛蔓宛轉野人烹葵蓼桑柘陰中飯對此

惜勞生厚生生益遠太息理輕策風雲滿前嶽

摩訶庵

鐘聲出林表日上羣鳥飛松際幻空色花龕影微微幽  
人坐煮茗山僧朝啓扉欲問無生義難同中上機

宿香山寺

溪橋蔓葛蘿空香滿風磴洄洄泉溜滴坐對前峰暝松  
覆堦下石花墜雲中徑高軒方偃眠泠泠度孤磬

潭柘晚坐齋心

至人離有無泯然衆機挫修持苟無力鬼神輒覷破嗚  
呼華嚴師冥心絕行作神龍不能見此地曾孤坐我來  
千載後道風想擔荷但恐纖塵隔虛空即點沆精誠發  
嚮往筋力愧孱頓白鹿階下行黃鳥花間過中宵梵唄  
聞肅然警偷惰

孟穀宿白茅寺用少陵贊公土室韻成二首挑燈  
細讀不勝見獵之喜遂亦斐然有作

幾日客中行却尋山中路王郎頗豪健惡馬橫溪渡入

谷四山合上月中庭素解衣各有造散坐盡成趣燒藥  
巖際訪採芝雲外步天地喻指馬世代荒厨顧轉惜對  
花草誰能度寒沍心依紫竹林手折青松樹山情托猿  
鳥霞想變朝暮何處衰天漿仙人掌中露

一夕山中宿心亂夢難靜曉來下山去日照青驪影迴  
戀此林幽仍苦前道永蒼鼠緣絕壁饑禽噪空井汗漫  
方遠涉何能遂夙秉風塵漸雜還心性自孤迴上書罷  
游洛買田豈投潁家門有名山便與萬緣屏種秫隨西

溪提壺任東嶺希夷老子在千仞蓮花頂

再宿百泉

重作薊門行小作薊門住西風昨夜來不辨泉與樹晨  
興益蕭爽頓爾憊心素淡淡浮雲盡渺渺飛鴻度牽牛  
寒有花葭莢晴多露境勝理自決心賞目皆寓尚覺腰  
組煩未遂垂竿趣何處鳳鸞音徒然謝高步

雜詩

美人一端綺文彩美且良珍重惜剪裁藏之黃金箱一

朝奉君子上衣下為裳榮華對知己顏色生輝光此心  
結三載徘徊立中堂何日理瑤瑟彈成雙鳳凰

藝圃十二詠阮亭先生命作

萊陽姜如農  
先生別業

南村

何須遠人境自無車馬跡叢薄日暉淺柴門淡將夕時  
有清風來藤花掃書格

鶴柴

清音警夜半竹露泣花井山人曉開門肅肅羽毛冷忽

向九臯飛中庭亂松影

紅鷺館

幽人生戒已孤館閉空翠正有鷺王來聽講無生義嘗  
托陽羨籠不換山陰字

乳魚亭

種魚蓮塘下澆潏蓮塘裏蓮塘朝復暮不住蘋風起一  
半綠楊枝隨風掠春水

香草居

托根在幽逕零落沍寒月春風來幾時一夜空中發望  
望綠無停清芬動超忽

朝爽臺

破曉石氣青清暉損千慮晨興攄遠抱理策高臺去遐  
矚方渺然直到雲生處

浴鷗池

藏機不肯來忘機不肯去泛泛綠波中悠悠淡無慮側  
翅入深荷池上山人語



度香橋

花源吹樵風濛濛過溪水有客石橋畔空香落懷裏只  
在水風間不辨從何起

響月廊

竹梧含夕暉風生碎珠玉不知新月上幽映修廊曲搖  
曳花林間禽聲墮空綠

垂雲峰

何處來孤嶂巉巖插花塢白雲乍往還只在峰前聚蒼

蒼園側陰天池墮毛羽

六松軒

偃仰長松下淵淵心若水不知歲月深且戀清陰美山  
雨忽飛來濤聲樹中起

繡佛閣

反聞聞自性萬有空氤氳稽首天人師寶閣梅檀熏一  
悟無為理不繡平原君

秋日同葉九來徐勝力馮圃芝訪傳青主先生

秉彛有同好言尋高世士騎驢出國門語笑斜陽裏郭  
外風景殊蘆花冒秋水竟到野僧家喜值於陵子吟呻  
驚老病語弱不勝齒聞言頷耆舊拭目辨鄉里竹竈藥  
火溫梧井菊泉駛庭前虛一琴床下閒雙履羔雁空招  
邀兒孫看坐起太息各無言歸途暮烟紫

題徐芝仙為笨山舍人繪三大士像

大海多波濤猶有大海見日日大海中波濤近洄漩此  
語雖親切依然成破綻性海萬法具寂寞生變幻山河

與大地由來此中建帆檣何所用滲漏即淪陷達者即  
安穩止在能護念徐生妙筆墨寫此具方便舍人獨神  
解酬以三足絹息心對應真不用求彼岍載瞻三大士  
遠離生贊歎嗟余何知識習深油着麵近始求解脫如  
拔骨中箭隨順罇町畦浮沉寧汗漫苟未絕纖毫即已  
成間斷豈假龜鼉力莫畏魚龍難是法本平等恐怖自  
生患變相畫師為畫者色忽變如此顛倒想徒然資笑  
訕願共入無餘乘潮到鄉縣

汪文升贈小楷五百字為別詩酬來美

頡籀法已遠其意則未衰如何後世人競妍失前規篆  
體大小分上蔡牽大兒隸書更簡捷雲陽成導師中郎  
起陳留石室傳何竒破塚者誰氏嘔血窮藩籬瑯琊學  
簪花少作悔已遲晚年體一變方成龍虎姿江陵劫火  
然鴛羣蕩無遺所以句曲翁申辨窮毫釐畫讚存典型  
永興獨得之此語具懸解不必皆能知汪子鑿洪濛獨  
欲探希夷取勢必縱橫天馬脫鞞鞢有如狂與捐不屑

中行馳豈知秘密藏正自山陰施二月山桃開小雨細  
如絲吾將雨中去倦聽玲瓏詞吾子何為者送我隨斑  
駝題箋五百字木難贈臨歧君家有汪倫送客昔如斯  
君情較淺深潭水堪一卮鹿城有大尹此道頗精思吾  
過鹿城道盤礴互淋漓相見首相告不待他言辭善則  
與人同大美吾敢私留取古情性庶幾星雲垂

鹿城大尹謂子

又

西城別墅詩十四首阮亭先生屬作

花枝近女墻歲月日瀟灑  
雖復在城市喧寂非車馬清  
風迴穆如知希和彌寡

石帆亭

風動袈裟角洪濤四溟吼  
如何不動搖片石土囊口為

賞正定心添種菱三畝

放翁詞石帆山  
脚下菱三畝

樵唱軒

採山因采真歸來發高唱  
衣上烟霞斑雜坐無禮讓身

忘草木年心寄尊盧上

半偈閣

大辨本忘言半偈又何著赤日東邊上素月西邊落不  
必更求心四大空索索

石丈

與世苦不諧聳削自突兀霜明耿介性雨見嶽寄骨莫  
謂德無隣有人具袍笏

三峰

白帝家門山何年竟飛去毛女發精靈欲共天孫語纖



月見庚方產藥川源處

小華子岡

右丞禪悟人千秋生則傲每思茱萸芥一理敬湖權何  
意春城西犬吠夜如豹

小善卷

洞中過天地居然小善卷焚香聊宴坐獨理朱絲絃溪  
割菴盡水人畊陽羨田

春草池

池上草茸色一卷離騷經謝客太荒唐幻夢不可聽愛  
煞懶公語春來草自青

竹徑

歌仄錦石路窈窕無凡卉去去綠陰中涼風動斐疊仙  
人何處來一萬青鸞尾

雙松書塢

讀書誰與共于鬢兩大夫更邀天際鶴營巢兼哺雛剛  
到春風候花飛醪玉壺

大椿軒

八千歲為春八千歲為秋靈根托天地世界真蟬螬何  
人知此意只可問莊周

綠蘿書屋

寂寂春陰繁因成元豹隱隔座花枝明到簾鳥聲近風  
牀書卷開幽人本無愠

嘯臺

蘇門有高士求怒不可得出水終大笑妙意誠難測為

想鳳鸞音崇臺願矜式

戴楓仲因夢作丹楓閣索題

夢是何人夢覺是何人覺夢覺本不二分別乃大錯憶  
昔大鹵行嘗道昭餘郭野水方瀾漫雜樹正綽約宛然  
江上楓湛湛照寥廓何處尋步履且來渡略約永懷托  
蒹葭高卧阻猿鶴長安翻握手有如偕宿諾云結丹楓  
隱乃效夢中作幽眇滉金碧經營種花藥邀人夢中遊  
幻出覺時樂日月跳兩丸火風互磅礴世界齊指馬四

禪即五濁飲酒與田獵衆生妄卜度參萬一成純背觸  
兩無著喜覺固為偏戀夢亦成縛夢覺俱不到可坐丹  
楓閣

送陳子文之安邑丞

維瓶處井看纏徽不自如常有寃櫺患提擲因泥塗爭  
似鷓夷膾滑稽大如壺亦自稱國器方托於屬車嗟爾  
陳孟公潔清胡為乎長頭偉容貌昂藏八尺餘高才坐  
憑几口占百函書贈我數尺牘藏弄等瑤瑜一朝佐山

縣不得縱號呼羞乞狗監薦甘受長官驅我亦放意人  
俗間久湛浮索米向京洛歸夢無時無誰知中條山贊  
府先我趨巖翠落官舍桃花明驛厨努力勿廢事小文  
難大儒春明我當來歸訪城南隅已無尚書期投轄真  
何拘看山過茅茨釣水尋菰蒲寧知叢莽間正復多酒  
徒堯舜已千鍾流傳皆百觚使君好與飲持螯帛裹鬚  
倒載入廳事酩酊雙吏扶解醒鴛漿泉遠汲風蘇蘇何  
用苦束縛約身如朽株長短各自裁官爵難強圖封侯

諒有定豈必皆區區一笑送君去方噪城門烏

壬戌初秋寄于學憲

憶昔客長安軟塵何浩浩金馬亦陸沈只夢舊山好歸  
來愜夙心豈敢怨枯槁讀書開北牕頗能任懷抱牽牛  
昨有花忽報秋風蚤惟苦奉饗殮不能具魚稻懷人向  
天末此意復誰道夫子真瓊樹偏能識鳳饑乘槎歷南  
海棹拂孔鸞飛仍聞浮丘山靈苗發芳菲安得五色羊  
從之弄清暉秋空吹晴雲一雁珠江去寧忘假羽儀殷

殷託心素洲通荔枝紅菴夢秣榔雨修敬久無階徒詠  
蒹葭句

古意上阮亭先生四首

錄二首

有桐嶧山陽貞朴含清音無言難自明樵爨將與臨卓  
哉古賢達此際能幽尋削之以就噐緯之以成琴提携  
在捐棄誰能存此心

清清沅江水宛宛衡湘蘭無人揚其芬幽谿空長歎一  
朝蒙採折芳香出林端流俗始知美羣衆方解看咄咄



非此人委棄春風寒

古意東徐勝力

美人艷南國顏色如朝霞昨來耶溪上妒煞芙蓉  
花秦珠隨月滿越練逐風斜獨慕孤高義今年尚  
浣紗

秋日簡阮亭先生

萬象本寂寥一心叢百垢至人心亦無萬象復何有先  
生金粟身方縮紫絲綬紅酣天女花綠醉麻姑酒妙思

魚脫淵間情風在柳嗟我三生緣虛懷邀善誘將無瓔  
珞街當年舊師友文字得閒居神龍困蚪蚪無學之學  
難還同証長久

送趙伸符編修使山右

涼風到庭戶客子方宵征宵征亦何為日夕計王程斜  
陽見騶馭高柳遲危旌遙遙發鳩水天際方迴滌井陘  
百戰地殘壘鳴飛鼙關路轉崎嶇野潦猶縱橫一日七  
十渡石齒何丁丁大鹵古仕國人文亦崢嶸君才本清

真為帝張八紘重賴獻納力闢門招豪英酒醴與笙簧  
所樂皆國楨嗟我邀末契華實無可呈幸藉少淹留不  
與璠璣爭有如明鏡前山精先遜形知人受上賞聊慰  
十年情

簡謝方山比部

牽牛寒有花芳草夕多露晨興遵廣陌涼風生高樹謝  
公書成癖下簾理章句鄴侯三萬籤自插防錯誤我亦  
頻過從飲河滿即去十年困俯仰奔走念行路擔簦湘

陰宿買舟漢陽渡苦思十畝間綠墻種瓜瓠讀書消世  
態射獵飽山趣如何事願違又向金門住相逢益傾倒  
情語過親故亦云鹿角關久負棲盤處春枝布穀飛雨  
壁蝸牛聚法曹羈鞅甚孤情少逸豫每值杏花時清夢  
往來數繪圖當卧遊退食輒長顧丈夫奮雄飛出處道  
皆寓正及身手健那得伴鷗鷺吾意早頽然山澤久沉  
痼貪看韋曲花笑躡東郭屨誰能借車馬君猶分坐具  
感慨成激昂風雲莽回互座有謫仙人請為鵬鳥賦

贈姜西溟

南海有芎蒲一寸而九節曾聞安期生服之入寥泮霓  
旌隨電轉飈輪逐風滅惟留阜鄉烏遂與世人絕吾生  
久頽放世事等一呷願言登羅浮竟訪還丹訣夫子純  
氣守上善無軌轍著書白玉堂走馬黃金埒衣被滿天  
下大道豈莊列鵬運九萬里五嶽俯一垓每呼丹穴侶  
天漿共飲啜何日踏梅花千山望成雪

呈徐健菴閣學二首

嶰竹生太古堅竒一千尋外具蒼玉節中有鳳凰音何  
人解黃鍾律呂空消沉宇宙感太和採擇出中林一吹  
八風調再吹天地陰元鶴一十二遙下閬風岑上叶雲  
門奏中暢夔龍心

弇山有鳴鳥為世發禎祥其聲中律呂其色備文章如  
何猶苦饑寥濶空翱翔阿閣無安巢飛飛去扶桑大海  
多風濤白日黯晶光耳目眩爰居抗味鳴高崗夫子坐  
元圃琅玕紛羅將朝薦齋房芝暮陳金盤漿飲啄何足

言高義不可忘  
覽輝下千仞  
願言耀虞唐

逢韓子用都下時方有婚事遂贈

前年芳草時游楚  
戒行李相候岳陽城  
同渡瀟湘水  
舟移飛鷺上日暮啼猿起  
今春復里門馬上顏色溫更向  
三巴去旌旆何翻翻  
豈意長安陌重來對霏屑尊酣新  
豐酒衣帶峨嵋雪聚散真何常  
髣髴日已蒼君適桃李  
期方為鸞鳳翔屏間雙孔雀  
花際兩鴛鴦燕喜對晴昊  
差可慰懷抱而我踏層冰  
却望海門道會有好音來雲

中下青鳥

贈伯亮張司馬

大運不可詰人生亦何常而我三年中春來皆異鄉前  
年風雨交扁舟入瀟湘經歲一歸來又復客汾陽今更  
留海壖依然垂空囊有如白鷗鳥流浪滄洲傍久客道  
益卑隨波空勞攘攬鏡自躊躇髣毛颯已蒼萬事無一  
成中懷祇摧藏遠慙荀奉倩近愧劉真長間中觀擣菽  
亦輒遭謗傷夫子坦白衷襟度何汪洋能容叔夜懶兼



恕次公狂灼灼紅梅開數為羅酒漿邀我賦新句水綃  
墨淋浪醉中禮法踈調笑喧中堂小妓頗便娟新為墮  
馬粧輕歌斂紅袖能招雙鳳凰忽轉鳳將雛人謂陌上  
桑一座盡傾倒吾亦盈百觴回觴屬主人此樂殊未央  
耳熱舞甘蔗竒氣自飛揚何必求神仙遠索不死方今  
古爭賢愚過眼皆糝糠遭逢豈力取徒爾攪中腸君看  
陰與晴明日即茫茫

自傲

浮世劇茫茫日作求死法貪癡猶不盡又問長生訣余  
尤業重者痛憤入心骨晨誦一卷經頻覺減內熱誓心  
不退轉洗滌到毛髮浮雲忽盡時露出青天月

題汪玉輪太史看劍圖

神物自可寶因之生愛惜何常有不平而始勤拂拭造  
化混洪爐虛無就形質晶光稍脫露已有通天色彩寧  
赤土發銛豈靈膏益百端銷落盡萬古一真實蛟龍秘  
精爽神鬼潛辟易比之君子心氣應蕤賓鐵

問橘

北地多寒苦橘樹豈易生愛此華實好移植勞我情昨  
年霜雪時結茅覆溝塍雖然稍凋落翠碧留根莖春寒  
既以過盛夏必敷榮其如世緣驅正月我已行生理果

何如馳書問柴荆

屢從家問囑弟  
霞料理橘畦

過悔人

長安艱旅食望門足先斂惟有就君舍慷慨屢呼飯得  
匪王陽術獲此數豐腴君家漢之渚種蘭聞九畹梅花

一百樹日日勞望眼苦被微名累德輝難一覽

君有覽  
輝山房

不須盟雪霜

又有盟  
霜舍

且與計飽暖從此簿領間日日執

手板方習士行勤難遂嵇康嬾我有文百軸零落失編纂感君意良厚許與事雕鏟凡此懷抱真不同世情淺將無宮商應氣味有潛感所嗟水霜時別緒轉難遣明日海門道悠悠自凌緬

題王秋史革二十四泉草堂圖

江南陸慧曉楊柳在池上此水即醴泉此木即交讓闕

西楊太尉曾傍阿對泉三公何潔白四世能名賢吾子  
有草堂二十四泉側不祝發禎祥但祝勵明德

題汪東山太史南浦送行圖

參差江上山微茫浦中樹落日閑孤城幽人此中去去  
去入京國高名振帝畿一隨丹鳳舞不逐白鷗飛芍藥  
號將離相贈春風裏豈知兆龍頭不肯兆龍尾秋草岍  
邊綠春鴻天際斜鄉闕多少夢猶自遶蘆花

詠梁史

南嶽鄧先生衡嶺有居處自立兩板屋聊取蔽風雨  
斷穀三十年澗水服雲母日誦大洞經修敬每偃偻  
恭惟魏夫人白日果臨甫玉女三十人皆十七八  
許絳羅繡袿褻乘雲集其所雖云有仙分篤實良所  
取求勞得則逸青鳥忽鳴舞香氣滿空山少日已冲  
舉

集青雨山房咏几案二物

小匡廬

九疊玉屏風渺渺西江上如何几案間已具彭蠡賞猶  
好近香爐白雲自來往

湘竹筆牀

參差狎管城縱橫近書史斑留翡翠痕潔浣瀟湘水合  
傍玉臺人且載天隨子

使院作

岷峨雪已消春波洞庭滿愁心理歸棹日望南風轉湘  
蘭不可佩孤居悵凌緬方訝雉登木仍嗟蠶在繭堅卧

拋陰符強飲墮金盃人生出處非百事已乖舛賢哲多  
苦辛不能自黽勉蚊虻與鸛鵲忽忽皆過眼颯沓衝雲  
傍徒傷道謀淺

雨中登岳陽樓

白雲滿南嶽隨風來洞庭波濤仍接連坐失君山青却  
上岳陽樓愁心晚冥冥飛仙不可招殘堞盤饑鷹我生  
何勞苦萬里如流萍艱難思往哲誰能安心形遙塞野  
竹綠俯掇春蘭馨千年花與草不獨怨湘靈



城曲眺望

朝遵城南路白石齒鑿鑿林中一鳥鳴江上幾帆落人  
家開竹扉樵子赴深壑塔影芳草間風來響鈴鐸

別王旦先

二月已將半江南雜花朵此時君不歸辜負間中坐君  
言三日行行李已包裹生平愛好春盛事肯相左烟水  
綠濛濛雞籠迎畫舸玉蘭正高倩垂楊復婀娜鶯聲一  
萬樹處處聽皆可東風動微波石瀨春帆簸我亦樂乘

潮塵綠苦羈鎖夢想攝山居未得縱江柁何日便南下  
夙願一朝果更覓獻花巖巖中暢容我逢君迭主賓笑  
語江風墮萬事一微塵超然離偏頗

姜伯達過小圃看山即事

種荷荷長葉種竹竹生笋小雨忽然至風綠接修畛之  
子具遠抱天機每相引列坐見南山白雲正無盡肯作  
巖際行仙家多石廩

贈汪舟次東豹人

今日汪贛榆當年桑柳州同一古性情不善干王侯小  
官就荒甸海氣浮危樓却有書千卷造化窮雕鏤朝吟  
祝其城暮閱劍水流黃熊看出沒畎羽聞嘲啾雲物任  
變幻烟花雜夷猶

聖代廣八紘巖穴多冥搜聲華久傾動公府先見叔一朝  
京洛來風吹日本裘回首鬱洲山遠拋青玉鈎天帝難  
驟謁金門還沉浮買書過慈仁聊作松下遊歸卧贊公  
房蕭然何所求囊米行且盡笑對雙平頭繫我比屋居

小過輒相留誰人與酒錢遂能設二占焦獲老狂客高

歌方不休

時豹人先生亦寓寺屋

亦復就君飲諧諺雜伶優苦云

處逆旅無人彈箜篌袂袂夢鄉縣兒語成溫柔借問杜陵叟高懷有此不人生真何常聚散難預謀十年最結想此地紛相投珍重良匪易莫惜頻勸酬明春知何如柳花吹作毬更化浮萍去相思空悠悠

贈高澹人舍人

北風動天地銀河五尺冰仙人紫府居手携長春藤却

看芙蓉花纔開一千層麒麟游靈囿鳳凰翔高陵常有  
青童來送以無盡燈嗟爾搶榆烏何如運海鵬

蚤春同苔文先生及舟次大可天生夜集王崑良

大參寓齋

御河水始開御柳鶯未囀鄆杜同羈栖春宵得良讌知  
交傾四海何必共鄉縣玉壺臘酒醜華燭羅屏顫王公  
負竒氣剛腸經百鍊學詩似常侍一為即高狷忘年謬  
推挹虛懷世希見勝侶盡招攜清言夜忘倦說士甘於

肉況復潔羹饌嗟余縫襪材難添補袞線早歲懼凶閔  
中年困貧賤近更慕無為理欲日交戰妄就承明廬終  
謝芙蓉殿還山構草堂柴門俯春澗蘆笋過沙鷗楊花  
掠飛燕夢結崑崙頂閒編高隱傳

余嘗擬為道隱錄擴  
高士傳之不備也

遠望周與召聲華在天半

### 贈湯西崖

江梅有鼎寶辛苦高人種委棄霜露間不作和羹用丈  
夫秉亮節得失何輕重且歌田舍酒暫歇賢臣頌持此

少年身百鍊始沉痛秋深石氣青木脫天宇空披襟仗  
瀟灑息念罷喧動歷想古賢豪大半出饑凍揮絃勸酒  
醪渺渺飛鴻送

韋左司春遊

堤草忽改色鍾山佳氣擁林暗車馬喧江影人家動纔  
見雙屐滑漸覺錦袍重散步更遲遲時花已堪寵

題周林於鷗塘種水圖四首

朝畊塘上田晚啓塘上扉塘中一夜雨箇箇菱芡肥白

金剛經  
卷一  
鷗渾見慣不肯避人飛

朝見藕花鮮暮見藕花盛採花兼採藕出水香逾靜欲  
問種水人紅塵失名姓

朝買魚妾來暮携魚子往策策復堂堂漸見魚兒長中  
有為龍魚一夜風雷上

種水常苦肥種山常苦饑買山未必是買水未必非盍  
去丈人峯來往新婦磯

繹堂先生齋中拜觀



御書恭紀其盛

世運適昌熾我

皇膺寶命一心周四海深居必恭敬聖明無闕事百職罷  
諫諍徃徃萬幾暇游藝樂清靜讀書到丙夜萬瓦金波  
映偶然事翰墨卓爾入神聖鬱勃蛟龍姿盤旋北斗柄  
載觀四大字心正筆皆正臣荃侍禁掖恩遇過韋孟宸  
章示寵渥稽首再稱慶光應千古垂事極千秋盛小臣  
田間來蟻蝨對金鏡瞻仰生戰慄嘖嘖歎道勁愧乏揆

天才作頌施無竟

和別王東觀

出門春草深入谷夏鶯滿客子思故鄉去去不能緩忽  
忽事行邁悠悠增別心天涯非所難所難新知音憐我  
西山樵愧爾東蒙客百年如流水歡此數晨夕重損瑤  
華贈商絃風蕭蕭慘然元灞水四月垂楊凋君言汾陽  
來我正汾陽去一帶藐姑山各覓題詩處

張水部修雷氏琴

製琴昔何人遺器留千載得者驚摩挲躊躇感時代宇  
宙浩茫茫日月沒蒼靄藏舟向大壑交臂失所在所以  
古至人鍊精除粗穢斯琴固斑駁中聲托其內解散復  
膠漆重類開草昧曾聞伐毛髓仙術肆陶汰修琴不修  
人吁嗟發長慨揮弦送飛鴻吾欲吞沆瀣

次趙城

向曉郭門北蒼烟濕流水嶽嶽霍太山青光落行李生  
平愛巖阿未得脫塵滓看山半馬上次第藤蘿美黃金

苦不成紫海渺萬里人生皆碌碌蹉跎遂沒齒遥期婚  
嫁畢曾孫又生子一笑松雲前早圖飯石髓

玉溪宴集

竹林俯春澗林下東風吹人生無百年為樂須及時良  
朋接阡陌相招同來茲烹羊設醇醪坐席歡更移耳熱  
行南原徘徊至東菑西望太華巔風雲變參差雪殘毛  
女洞日下希夷祠古今幾旦暮盛滿不可持酒闌吾已  
醉欲採商山芝

遊風穴簡陸雲士

汝州風穴寺城西白雲裏出郭芳草深得此林壑美栢  
子周四山桐花通一水香閣接幽巖僧飯資禪喜石潭  
見空性澄澈何終始潭上新筍生潭下舊蘭紫谿風吹  
午鐘脫然謝糠粃相逢采山人念爾宦游子

西園宴集二首

錄一首

我我九峰秀人家山水半草堂誰結構幽思玉溪畔相  
過忘主客石上青精飯雲來松際陰泉到竹根散美人

雙荷葉嬌歌再三勸莫惜金縷衣浮生幾昏旦

簡方山先生

浮名久為累悠悠究何成因之河山陽買田事躬畊春  
雨苦不足澤雁紛縱橫始知饑驅緣難與造物爭再作  
京洛遊朱門羞將迎僻居守寂寞豈曰全堅貞夫子獨  
愛我始終無世情惟茲孟秋月蜻蛚時一鳴騎馬特相  
過喜趣今朝晴大藥本無術至道思乃精吾欲溯元化

同奏緱山笙

將歸中條呈阮亭先生三首

錄一首

玉露下庭樹，桂醕紛具陳。  
再拜稱百觴，願祝千萬春。  
世道日輕薄，砥柱望天民。  
庶幾位台輔，坐令皇風醇。

題素士旦小照即以為別

二月來京師，京塵何浩浩。  
昨日涼風至，只覺還山好。  
之子雲鶴姿，讀書窮要眇。  
衣拂敬亭雲，酒醒新豐道。  
匆匆得握手，真快機緣巧。  
風前倚輓轡，意氣切雲表。  
畫師復何人，精思入窈窕。  
能寫慷慨胸，玉立傍修篠。  
恨不攜之

去空谷伴清曉世事閱始深大道求愈杳不敢天下先  
苦縣昔所寶願以贈臨岐堅貞永相保

香泉

香泉鹿城大忍寺泉也陳子文使君飲而甘之構亭其上名之曰香泉余過題詩遂以為

別

乳窟有蝙蝠千歲化為白微軀何足戀生理尚知惜嗟  
哉丈夫身昂藏儼七尺胡為競貪冒天機日狼籍甚愛  
必大費珠玉歎輕擲十月鹿城道小憇越阡陌偶酌泉  
水香感慨風生腋將無無熱池於茲潛遠脉使君具懸



解構亭著雙履銀瓶汲鉛華石鼎鍊金液倏忽得要妙  
疾如馬馳驛更喜金界近寶閣鎮潮汐碑古薤倒披經

富蓮橫積

寺有隸碑甚古全  
藏一部積篋中

恨不謝塵累久住濯精魄

纓組君正煩饑凍我方迫題詩留碧玉灑酒振歸翮一  
水一切水浮幢何間隔大道本無負交臂豈創獲兩兩  
素心存終古照泉石

### 春雪曉望

密霰夜已零杳靄漕河路朝來南浦望誰躡東郭

屨柴門半隱顯靜掩溪邊樹一鳥破烟飛有人雪中渡

古芝山房詩為劉敬亭賦

余家大河上門對蓮華峰一日十二時常把青芙蓉欲作采真游幽懷苦未從之子中壘後五嶽具竒抱早嗜神農書晚契商山好曾不一縑值已得三秀草靈根產何年其色古而腴一機妙出入元化與之俱毛女不敢餌留之千載餘神物鬼所秘豈溷韓康市一朝不自愛

實為君子至供之齋房中足辦一生事

簡方山謝先生

下簾坐清晝讀書緬前哲如何寂寞人屢煩長者轍  
花林共偃仰風磴互蹙蹙烟暮春松暗鶴踏老槐折不知  
芳草意勾萌幾甲拆萬物機出入一法杜生滅朝來惠  
佳句清思濯冰雪海日上曛曨高吟動寥泬

石潭夜泊

烟盡北斗垂明河淡秋影石潭泊舟處風篠娟娟靜閑

鐘渡水歇宿鳥投林猛素瀨見漁燈花枝坐中暝

贈竹垞二首

三日讀君詩五日見君面不謁門下省已出瑤林殿浮  
榮何足惜世事本多變莫便學班姬秋風泣紈扇  
曲巷浮埃多相尋日已昃感君不得意猶有好顏色豈  
非十年內得此讀書力握手當路歧不負昔相識

簡楞香兄

哲兄瑤林姿高文久彪炳朝辭新安江暮入金華省承

恩歸屢晏日過花磚影幽齋富圖籍下簾心逾靜賦成  
金石墮書就龍蛇騁一字落人間已與瑚璉並頗驚裘  
馬客造門日求請繫余昭穆分親愛同氣等風軒杯每  
接雨院燭常秉無學資高深有言聞要領池塘芳草時  
誰能和孤迴還當數過從花林鬪新茗

過介休郭有道祠見傅公他隸書中郎舊誄歎美  
不已紀以詩

繫馬古槐下槐花石堂偏誰書有道碑古法蛟龍纏其

文中郎舊書亦堪比肩嗟哉濁堂老縱橫照秋烟鴻都  
蹟久蕪帷幕留殘鐫夏承誰呵護靈光猶巋然魏魏九  
疑頌託跡於神仙此碑妙接武絕響續千年梁鵠鄙不  
為頡籀或後先我來重歎息典型欣目前坐卧欲三日  
苦被塵累牽上馬再回首孤鵬方高騫

題趙叟小秋

善琴

共城有一士七十無心想家依嘯臺側門開百泉上竹  
裏每醉卧山中或獨往但携一壺酒不知屐幾兩有時

揮五絃萬壑秋濤響我昔泉上游久欲就蒼莽買山苦  
未就徒然增慨慷相逢感夙心且與共偃仰

白石精舍

初日寺門暄微風塔鈴響巖水餘滴漑谷鳥悅深廣樵  
聲來遠壑竹影交銀榜寂寂下庭陰回身禮金像

兀坐

兀兀寡人事寂寂忘心想閒臨庭戶間坐看春雲上竹  
樹頗陰蔚烟水亦沆漭鶯聲過喬木鶴子下菰蔣忘機

復何言遂已窺象罔

過巢溪

巢溪清見底白日如擣菹水禽各鳴喚兩兩機心無殘  
雪沿溪流轉入汾水隅天氣漸和柔蔣芽生紫腴感此  
時序遷况復景物殊古人不可見對茲心躊躇

過孫向辰書屋

幾日不相過新笋已成竹竹間兩黃鳥飛遶讀書屋我  
來北窻下愛爾詩盈束何當携素琴共掃清陰宿



秋日即事

閉門賦閒居陰雨連朝夕今朝晴稍開遂至原南北汨  
汨碧流駛漠漠秋烟織登眺頗俱宜欣賞良非一白雲  
忽欲盡了辨前山色農人腰鎌歸穉子荷蓑立

擬古

春風到庭戶百草皆知榮此心不如草寂寞從中生曉  
起閨房暗羅衣寒盈盈故人在他縣憂喜難分明婉彼  
燕趙女把酒勸聽鶯華筵不能久反增離別情念此轉

憐惜何事客中行

勸酒

東海日曛曛光輝遍林藪借問晞髮翁此日何年有連  
朝北風惡水合直沽口却憶海上山山中雪應厚黃精  
苗有無欲劚但回首不如層水下生魚比纖手鑿水下  
絲網素鱗燦堪數薦之白玉盤盤魚色難剖請得魚一  
頭可勸酒一斗一斗復一斗醉倒洪崖友回看東海日  
又上牕前柳

銅雀妓

銅雀臺漳河岸歌舞出彩雲散可憐人君不見不見奈  
君何漳河揚素波日暮悲風起秋聲何處多陵樹晚烟  
織松檟紛無色帷幕棲寒陰君王夢難識願將妾私淚  
啼作西陵雨何以至君前野風為吹去



蓮洋詩鈔卷一

欽定四庫全書

集部

蓮洋詩鈔卷二

三

詳校官侍讀臣陳崇本

助教臣常循覆勘

總校官原任中允臣王燕緒

校對官檢討臣李學錦

謄錄監生臣柴汝誠

欽定四庫全書

蓮洋詩鈔卷二

蒲州吳雯撰

七古

昌化寺觀吳偉畫壁長句

晨興騎馬緣山嶠  
初日照眼明金鋪  
石磴無人散松子  
入門茗菴追清娛  
何人善繪江夏吳  
應真五百窮規模  
其上調御古丈夫  
諸天劍佩紛來趨  
袈裟一縷覆大地

三大劫等翻轆轤無所從來亦無去始終不異難覩關  
兩壁磅礴盡意態凌風蹈海神靈俱鸚鵡塔向指尖出  
猢猻藤傍眉端扶作使天魔如使奴猙惡惛伏情恬愉  
公無渡河胡為乎只愁胃挂摧頭顱何事毒龍肆吞嚙  
乃從腥吻結跏趺縑素膜拜驚且呼毒來慈受毒囁嚅  
人間橫逆豈不爾參互比擬皆無殊鵲巢於頂膝穿蘆  
天花落處成毘瑜如此定力合讚歎總持妙湛將同途  
金錫汾陽示激勸圓相為仰開蒙愚西來之意豈盡此

令人惆恍生躊躇山水暴漲能徑渡髻珠道人斥其誣  
幻化由來亦輕渺忍俊不禁堪胡盧自乳生酪酪生酥  
酥分生熟成醍醐搬柴運水神用足粥飯既了滌鉢盂  
貧子得珍乍驚喜終非長者安其帑細觀蘭那見奇特  
所詣已善猶有虞將無顯異尚惑衆波提木叉還自逋  
即如延陵此繪畫煙絲霧縷真難摹當其經營備慘澹  
可悟萬象由虛無識心達本乃至要莫眩五色隨糝糊  
去愛有如摘懸珠一一摘盡愛水枯聖凡不立是何境



性清淨故超瑕瑜

陟嶺赴潭柘寺作

一嶺鬱岩堯橫斷潭柘路香光莊嚴渺何處奮力登躡  
頓忘疲豈云濟勝全無具忽然湧出青蓮花千峰萬峰  
不知數人在青蓮花裏行僧在青蓮花裏住豈知勝地  
限咫尺功力未到終難遇寶閣崔嵬入雲表石龕巖磔  
開珠戶雨後爭看修竹林鶴來忽動青松樹珠泉滴瀝  
遞空響鴨脚甘蔗蔭行步齋厨供饌衆花集長廊梵唄

神龍護嗟我勞生暮棲隱對此真令屏塵慮安得早謝  
區中緣靜息西巖發深悟

蔡州道中

鴻邠陂南蔡州道千里黃雲漫秋草白龜浮波天茫茫  
瑤林垂實珊瑚小汝墳客帳聞荒雞犢車碾破花溝泥  
倡樓雁斷思不斷珠燈照夢沈玻瓈池謹鵝鴨冰雪改  
豈為封侯躡重壘愁結胎簪走玉龍橫出南徐入東海

贈杜蔚門先生

郎君谷口花無數樓巖寺底竹十畝幽人來往花竹間  
心與白雲淡無取避世即是鷗冠子忘機還應漢陰叟  
虎溪醉客歡把臂龍藏禁方秘懸肘讀書不厭細如髮  
作字何妨大同手將烹赤鳳喜鼎溫欲採黃精愁雪厚  
藥奩紫芝蕪丹砂世事白衣任蒼狗垂葉旋看鉛花生  
丁女正藉壬公守嗟余久嚮鸞鶴羣勞生空作馬牛走  
長沙近復憂壽命張仲恐難終孝友却仗我翁常慰藉  
未可志氣便衰朽昨日東郊迓春仗一夜南園變風柳

青旂猶欣重到眼花勝寧嫌亦挿首從此相過踏芳草  
或可雨留剪新韭石鏡舞雞對烏儿湖船射鴨拍銅斗  
人生適意聊自足鼯鼠飲河量所受阿誰能解踏踏歌  
為翁一勸薄薄酒

貽洪昉忠

洪子讀書處靜依秋樹根車馬何曾到幽巷骯髒亦不  
登朱門坐對孺人理典冊題詩羞道哀王孫長安薪米  
等珠桂有時煙火寒朝昏拔釵沽酒相慰勞肥羊誰肯

遺鷓鴣鳴呼賢豪有困阨牛衣腫目垂涕痕吾子摧頽  
好耐事慎莫五內波濤翻屈伸飛伏等閒在總於吾道  
無亨屯前有萬年後萬古刹那何用爭鸞鯤君家西子  
湖鷓鴣交文鴛湖上諸山太蒼翠歛從海外飛崑崙掉  
船載酒便亦足天漿手挹神騰掀少伯百計乃得此胡  
為懊惱嗔山蓀紅褪錦髻過蕭寺虎靴桃杖投煙村頽  
然醉卧藉芳草忽忽明月升金盆

海天長嘯圖為張輔公別駕題

海天浩浩何端倪海風吹水如玻璃  
中有高人洞元化襟期廣達無町畦  
眼前萬境不能惑天外三山如可躋  
一聲長嘯徹雲表迥然鸞鳳干虹霓  
青松鬱屈動鱗甲丹藥恍惚存刀圭  
歲月煩囂任擾擾生平意度常折折  
道服身並九臯鶴酒杯手捉駭雞犀  
童子葫蘆何所挾蘭臺叙傳或相齋  
况有神駒稱邁種七日超母驚驛奚  
桂枝結實蘭芽茁一堂三世荀陳齊  
從此門閭益高大上林珠樹容聯棲  
繫余卅載托耒契杯鐺橫攪金留犁

閱閱方看韋蕙杜朋好還次阮與嵇今日重過羨爽健  
氣清貌粹頻招攜芍藥堆闌間玉版檳榔滿斛交金蠶  
何人繪出高世姿獨立海畔島嶼低一時相對意飄渺  
圖中座上眼欲迷朱霞南映北海北青裾東拜西山西  
古今何似蝸角觸世界忽如鴻爪泥題詩擲筆且大笑  
安得玉虬為駟隨風鷲

韓周京司馬招集鄭谷山園看牡丹次晨遣力送  
花報以長句

廬陵醉翁稱好事特撰洛陽牡丹記著作仍是五史手

君謨書法益精緻如何愛重反詆訕瘳木比擬失倫類

極美苟與極惡同大聖陽虎皆偏氣其中惟有釋花名

撮要分疏頗詳備丹州延州各有種粗葉細葉總堪識

九藥真珠態最殊倒暈檀心格尤異再三細讀轉增感

瞬息繁花有遷易宰相園池盛桑麥

魏仁溥花名魏紫

僕射駝

馱香銜轡

張齊賢花名青州紅

品目誰辨軍容家

唐末有中官為觀軍容使者花

謂之軍容紫

溪山已改龍門寺

唐相李藩別墅在龍門改為潛溪寺謂之潛溪緋

中



條之麓多水竹其間卉木亦妍媚將軍舊墅君能守丞  
相家風儼不墜穀雨已過花尚開愛客移樽花下醉朝  
來折枝還贈我鹿胎蓮萼今何愧却念此花護持好遂  
使顏色免顛悴雨露雖同天地力剪伐實恐樵牧累當  
年此花載本草風俗何知宜與忌褒斜道中推為薪豈  
料山河表祥瑞歌詠初見賓客詩夢得有咏魚朝  
恩宅牡丹詩稱述  
久入康樂議靈運言永嘉竹  
間水滌多牡丹極盛必待開元後珍卉難  
強時未至自唐則天後洛  
陽牡丹始盛嗚呼萬物遭逢無不然題詩

馳謝發長喟

寧陽周太師母年九十餘善飪而健喜而詠之以  
當登堂之一拜也

太母年九十康健不用扶將無有道然豈但天秉殊太  
母於吾母其義猶為姑小子別庭幃今已九月餘夢想  
念慈顏惟恐色不愉忽聞太母健其心怡然舒太母九  
十既如此吾母七十必安居歸述太母吾母前即以太  
母為母娛吾母聞當拜太母遙遙東望整襟裾太母有

道授吾母臨風專望北來書

里中送韓翌宸

有序

癸甲之交識翌宸於長沙幕府意氣傾倒歡相  
得也自此離合之際動歷年歲升沈之感更復  
惘然庚辰嘉平再過蒲坂把握讌歎欣戚交并  
甫獲中歲寒之心詎遽作春明之別依依楊柳  
青未盈條惻惻離亭紅翻掩袂敬賦  
長句聊當歌驪凡我同人皆宜泰雅

當年扁舟青草湖寥落江上稱窮途艤舟更傍黃陵廟  
把酒長吟魚獨笑煙波風雨浩茫茫無衣客子垂空囊  
鷓鴣聲中歸不得躑躅花前神暗傷伊時中丞開幕府

再拜軍門色先沮豈知延禮出尋常留我華堂迭賓主

翩翩公子冰玉姿橫槩江頭工賦詩座中更有文章客

李白

此瞻

羅含

宏載

皆在茲彈指年光歲復歲盛衰之際心

如醉豈但客子如轉蓬歎惜繁華已遷易羨爾公才迴

不同步武方追舊鼎鐘官階不失中郎貴雲朔仍留萬

石風可奈繁霜忽又早鷓鴣一鳴歇芳草世事還驚掣

電飛人情更訝狂瀾倒昨日新從浦口還家門却比客

中山雪中鴻爪雖難定海上鵬雲終不閒昨日臘雪暫

相駐今日春風又復去  
槃園梅蘂惱人花  
大河楊柳傷心樹  
更念高情為我留  
金昆玉季情綢繆  
取歡便可鸛鶴舞  
貫酒不待鸛鸛裘  
刺促無端道傍別  
青絲玉壺轉愁結  
鶯聲猶凍谷口雲  
馬蹄已破中條雪  
噫吁嘻人生聚散  
本無憑但能努力  
終飛騰榮戟原是  
君家物十年仍可  
大中丞

放歌寄趙秋谷太史  
秋谷罷官余在山海  
未能走送特寄此奉  
慰兼寓勉望云爾

大海為蓮池衆山即蓮花天風萬里肆排蕩萬柄青玉  
交杈杼千艘千蜻蜒一島一蝦蟇忽然夜半赤日上波  
心飛出黃金鷗我當此時飲一石褰裳濡足思無涯恨  
不即攜秋谷子把袂浮拍吟瓊霞三日得君音使我情  
咨嗟知爾縱飲罷官去歸途雨雪車啞啞京國急來問  
親舊憂爾負氣神參差豈知漁洋北來正遇爾道爾胸  
無芥蒂顏貌嘉眼前纓冕如脫屣猛風吹盡恒河沙噫  
吁嘻人生萬事何時了朝起營營暮擾擾官爵九遷仍

苦旱黃金千鎰終嫌少吾子賦性殊不然棄官無悶方  
少年得失榮枯本閒事誰能不動天中天噫吁嘻秋谷  
子大奇特不負當年好相識力大能持震電驚心空不  
受天魔惑噫吁嘻秋谷秋谷方汝行恨我未能飲汝以  
濁酒勸汝以素筍爾去且復藏其名精金大冶百鍊堅  
貞

九重聖人真聖明他時再起東山謝方知爾可付蒼生

贈陳其年

漁陽桑葉落寒風遂蕭條美人遠自江南來手持明月  
簪瓊瑤乘秋理鏡發高詠和以鳴鳳秦臺簫傾國傾城  
誰第一羨爾榮華艷朝日從此承恩入藻宮宮中行樂  
何時畢

槐石歌為佟儼若賦

中丞清白世所無罷官便同山澤癯一朝賣宅悵無居  
假屋聊取安妻孥公子矯矯才氣殊鸞翔鵠峙羞泥塗  
移家空載五車書下鍵却掃追清娛翻喜新堂槐蔭鋪



當門怪石蹲於菟解衣盤礴興不孤間有好事來提壺  
長安酒肉厭屠沽高樓燕笑羅擣食鴈而美閒且都  
明燈廣廈張矍瑜公子寂寂胡為乎據槐倚石仍咿唔  
嗟我四十悲頭顱尚書朝請計總迂胡不歸去軟塵俱  
松風真負青山逋過從數坐青珊瑚摩娑石丈稱吾徒  
聞君指日江南趨猶為饑遣爭長途回視此樂不可圖  
況欲高館吹笙竽嗚呼廉吏可為言何誣不見楚相之  
子負薪啼路隅

贈匡山老人郭翁臯旭

匡山老人齊得喪，髣髴蕭騷骨骸骸。  
讀書萬卷眼不昏，飲酒一斗神猶王。  
五經腹笥何便便，蹉跎一官失少年。  
宰相豈肯借車馬，司業何曾與酒錢。  
竭來燕市屠沽飲，醉聽琵琶夜忘寢。  
節鼓常敲翡翠盤，翻杯輒浣葡萄錦。  
千鍾百榼氣轉豪，客帳猶懸舊寶刀。  
起舞身搖謝蝴蝶，和歌聲亂鄭櫻桃。  
忽對長空見歸鳥，自傷為客何時了。  
金馬門前再住難，春明待走邯鄲道。

宋觀察牧仲過海門見示悔人早春倡和詩依韻

賦贈

憶昔少年尚馳騁頭顱四十愧朝請已知不是宰官身  
自分常依居士嶺騰擲休任獼猴狂精進當學獅子猛  
其如結習愛文字有類柔梯發枯梗丹經一笑帛裹鬚  
皂帽幾頽墨淋頂惟信胸中少鱗甲峨嵋雪水一千頃  
食貧廿年成遠遊世態低昂暗知領本性往往受拘縛  
夷則鏡困蛟龍井入洛安得比鄒枚懷沙只可弔屈景

公也威鳳知鸞飢作歌傷我羽毛整更念瑯琊及安德

殷殷慰藉常記省細雨空懷野寺梅

客春雨中阮翁炎約看花善果寺

風幾憶巖關香

方山有杏村別業在鹿角關同人皆為賦詩

誰知羈棲東海

邊公來同啖雲門餅兼云勝友朱桃椎衙齋鬪韻奪香

茗攜將佳句爭上駟貪誦偏宜春夜靜才力韓孟各分

疆交情盧馬同一礦歸來長嘯驚神魚月明棹撥玻璃

影我亦蚓竅發蠅聲却令珪璋束藤綆公言明朝當早

發使我延望愁日永舉首高天雁正過島嶼蒼茫晚猶

靚移情是處感成連塵慮喧囂一時屏故人已去鄉思  
深夢入通天見沈炯低頭重懣起滅心水本無波木無  
瘿

題張振宣行人小照

君家別業招賢里幾次尋山探石髓簷前每宿太華雲  
池內常分玉溪水溪邊楊柳何毵毵水色空明天蔚藍  
閒來把酒溪上坐鷺羽扇子揮晴嵐更喜青衣能解事  
窈窕臨風柳邊侍湘裙小感玉壺傾美鬢不動金釵膩

羨君斜倚黃瑠璃

篔簹也退之詩一府傳看黃瑠璃

滿酌天漿對水湄真

珠波濺聲喧處菡萏花開香到時繫余溪山縱遊行澗

東七聽春鶯啣

余住永樂凡七載

花塢難忘載酒頻竹林猶記

題名徧今日重來東海頭久煩白飯兼青芻畫圖琴酒

轉相感將無仍是西園遊君方置身在廊廟翠翹枕畔

催朝早安得依舊風柳前遲迴高卧爬仙爪

題文伯仁山水卷

最有江南客能畫江南山江南山色綠於染人家住在

青冥間溪橋橫互幽人渡渡口蒼蒼隔煙樹多少樓臺  
春雨中山鳥山花自朝暮古寺朱墻倚石屏雀離高映  
錦帆涇千株松下無人跡只有風吹九子鈴

東江解州辰六

中條山下來時路幾日楊花作春暮馬上頻看戴勝飛  
花開舊館應無數今日仍從山下行花枝低亞宛相迎  
南鄰酒畔定相待況復堦前新筍生新筍生時如碧玉  
相間花枝照茅屋篋裏亟尋荷葉杯案前再補陽春曲

其如垂索意蕭然，遙念花枝誠可憐。  
歸來不用賒春色，只向先生乞酒錢。

有題

花枝濛濛遠金屋，蝴蝶一雙兩雙宿。  
風歇香輕歸鏡臺，曲屋羅屏畫生綠。  
美人曉起幽夢闌，啼鳥隔樹雕牕寒。  
見春欲問春深淺，自捲珠簾帶月看。

吳門逢春感賦

少小不自立，生計苦依人。  
夢怯廣陵雨，神傷揚子津。  
揚



子風高不可渡行人盡立江頭樹日落江城早閉門草  
草相隨片帆去才過京口是丹陽曉起推篷船滿霜寒  
雁蕭蕭迴遠浦啼鳥啞啞立殘楊殘楊不可挽嫋嫋凌  
霜散我欲維舟一問津長條未繫風吹斷吳關漸近吳  
語多舟人來往皆吳歌可歎相逢不相識匆匆回首各  
乘波乘波去不已同棹吳江水江客方過野埠西郡樓忽  
見青山裏城裏城外梅花新官街不雨亦無塵烏鵲橋邊  
窺扇客錦帆涇上卷簾人間情已說風光好酒船日日

閨門道自恨黃金不繞身轉覺無顏對花草歸來愁坐  
晚鐘聞拂拭吳鉤到夜分江上久無嚴僕射月明誰是  
謝將軍追維始道此行誤翻自來時想歸路江山日遠  
路日長況復飄零歲方暮鎮日思歸不得歸江南轉眼  
又芳菲可憐謬逐稻梁客空負山中蘿薜衣幾回遠望  
百憂集歸來又向官橋立黃鸝巷口草青青厭見春風  
等閒入百歲能勝幾浪遊徘徊獨倚仲宣樓丈夫事業  
須早立莫使蹉跎成白頭

桐石咏贈佟霞菴使君

山中早約桐花開  
花開時節桐鄉來  
今年桐花開較晚  
三月無花葉猶短  
而今四月清和時  
桐葉生肥花滿枝  
使君愛種雙桐樹  
傍石栽桐拂煙霧  
桐鄉士女壽桐君  
桐花桐葉何紛紛  
我亦特來酌一斗  
為祝桐君三不朽  
半醉不醉笑靨紅  
如珪桐葉含清風  
東山月上暮天碧  
醉把桐花卧桐石

關門還戲和趙旦復即奉答

雪中鴻爪真何常空驚歲月去堂堂惟有幻夢留影響  
海若蹴蹋魚龍鄉日暮慣見關塞紫冬深頗訝邊雲黃  
結騎同過南海上海天萬里空青蒼濤波下瞰鮫人室

島嶼髣髴龜茲王中宵赤日湧金液羣陰消盡騰純陽

徘徊興盡仍返轡談奇指劃思源莊

思源莊去山海關五里乃張水部創

立  
隻肩下酒可一石醉後笑語聞琅琅晚來閱伎圍紅

燭耀輪咫尺移金閭曉起遂虜更數肋獵人四會如堵  
墻冰上守狐手指凍雪中射虎馬尾僵樹精聞盜初祖

履盧令稱繼風人章紫貂襜褕賤難著曹風且詠麻衣  
裳有容更道懸陽好摩登迴在青雲傍聞言疾馳鐵圍  
底鼓宮應宮商應商盤馬萬山石确犖蒹葭何處愁中  
央到來一洞通天地維摩十笏難丈量石塔宛留鎖骨  
蛻百寶爭獻波斯裝如此跋涉亦不惡葛屨省怨來朝  
霜或迷團雲在深谷僻壤未愜居人腸詰朝束縛勉一  
至忽如豆食更精梁七重行樹四山列九品蓮蘂雙峰  
藏苔龕宛轉任鹿女乳泉窈窕留天漿蓮洋學人怯亦

勇木斥甜雪隨騰驤捫蘿直上九千仞崑崙絕頂傾餘  
杭欲驂鸞鶴訪瑤圃恍騎麒麟臨大荒揮手待挽不周  
柱濡足直踏朱雀航縱橫寥廓我非我脾睨今古狂真  
狂豈知勝事難把玩歸來水滸違山岡中厨清冷鼠墮  
甕高齋索寞龜支床椎髻幸有舉案孟賃春寧哂牧豕  
梁寄語天魔老鴛崛禪悅雖美輸糟糠

江樓憶弟

樓下江水何其深對江山色常若陰八月正有梧桐雨

千里歸客愁難任鸚鵡洲前秋草綠鷺鷥鷓鴣雙雙宿  
只有衡陽雁一羣恨不同飛聲斷續

謝公杏村讀書圖

鹿角闕前春水流鹿角闕外鳴春鳩杏花千樹香十里  
花開常護讀書樓我愛謝公好才調讀書萬卷猶嫌少  
每到花時只讀書總有落花常不掃幾年腰組入長安  
讀書依舊看花難畫師為寫讀書處宛聽伊唔花未闌  
余亦辭家一百六花裏逢君帝城曲見畫為君色惆悵

關前誰鎖讀書屋君言萬事皆等閒讀書豈必家門山  
畫中看屋眼前是但取古字窺蒼顏我聞君言轉增喟  
境不可執書亦礙堂上讀書笑斲輪糟粕何如醇酎對  
輦路連朝風日佳出門況有千杏花讀書爭似花前醉  
且擲殘書入酒家

題姜郡丞畫扇

久思中條結茅屋因樹為堂映新綠樹杪三疊五疊山  
塔下千竿萬竿竹使君騎馬山中來手攀嘉樹心徘徊



高情待躡崑崙頂天半流霞酌一杯繫余採山愁日晚  
白雲深處聞雞犬丹竈方覓葛稚川石髓難逢嵇中散  
雲間高士才情妍能於筆底生雲煙夢回白苧城邊路  
寫出綠葭村外田

曹平叔坦華亭人住綠葭村即以自號因畫此景

田際鳴鳩

喚春雨望杏瞻蒲人作苦行春  
耑待使君來江北江南  
遍歌舞雉尾尊生萍澱湖九峰三泖望模糊却從一幅  
雲林畫兆作文翁善政圖

題蜂子蝶花小景畫扇

我聞羅浮山蝴蝶如車輪麻姑仙人據其背凌空笑看  
三春花又聞神人探道秘吐飯成蜂等遊戲而今蜂子  
作花心花耶蝶耶何同異畫師狡獪太無端小草紅藍  
錦作團司馬心情能坐嘯且拂齊紈操猗蘭

送孟千一赴銓

新笋如簪荷如錢往來醉向山堂眠山堂主人修靜業  
愛我親煮堂下泉新笋如林荷成蓋主人求官歷燕代  
林中有竹池成蓮主人不在山堂在看竹雖諧野客情

酒酣誰惜狂奴態  
主人行色太匆匆  
堂前酒酌珍珠紅  
迴尊再勸主人飲  
明日山堂煙靄中  
主人分符作民牧  
亦伴行春雙白鹿  
判牘寧忘一頃蓮  
折腰應憶千竿竹  
我傍汀洲採白蘋  
君今圭組已榮身  
他時獨往山堂下  
還酌山泉憶主人

莫亞夫先生贈我臨帖二冊皆山陰父子書也用  
筆特妙幾欲亂真敬報長句

亞夫先生筆墨殊貽我  
臨冊今所無  
山陰父子有穀率

隻手雙攫金僕姑轉使有類鶴引吭迴翔宛似鷹顧雛  
雪中韞脫活鵬鷗海底網罟生珊瑚明艷春風媚桃李  
澄澈秋水排擣蒲忽爾遶柱蛇激電忽爾曳尾龜負圖  
公孫劍器太熠燿宜僚丸弄爭須臾鸞蹲鳳跂各異態  
龍跳虎卧皆同模釵脚漏痕稱晚近驚沙蓬振追前驅  
技癢難倩麻姑爪狂笑欲裏司空鬚吁嗟先生胡為乎  
行年八十藏菰蘆早有文章驚帝闕晚隨鷗鷺浮江湖  
空傳恩澤在民社桐鄉酒肉雜笙竽有時朱顏如醉飽

朱邑為桐鄉令有惠政後民立祠祀之而邑於祀日即面有醜顏

兒孫滿眼終難舖嗟

我半生久零落知非年過仍顛愚今始登堂拜父友大

人行輩情急輸入門驚見形貌古咤嘆不已天為徒化

腸為筋理則有

神仙化腸為筋故能不殺食血化白乳也

鍊身同鶴道豈誣

李翱贈詩云鍊得身形似鶴形千銖松下兩函經我聞大道無多語雲在青山水在瓶

休訝先生

山澤癯龍門傳記列仙儒朝夕過從命飲食雕盤羅列

筍與蒲江南橘剖黃瑪瑙潞州酒滴紅真珠魚鱉膾鯉

無不有折項真見鵝鴨俱溫言獎勉意良厚憑几含醜

興未孤酣暢不覺發清辨口道堯夫經世書先天後天  
在指掌太極無極非畫圖修身更進參同契戊巳刀圭  
研上虞小子聞之醒聾聵宛丘不負循墻趨臘雪已盡  
未歸去又見春風來坐隅生平有願皈道業擾擾塵心

難驟剗醴陵終愁筋髓冷

江淹封醴陵侯文集中有  
恐筋髓衰冷之語

長沙

早恐年壽徂遠游輒思隱懸雷垣闕竟擬修蓬壺結習  
無如障文字世緣那便拋妻孥筋力柔脆更自哂仔肩  
大道非凡駕畢萬七戰全牖下

畢萬鄙夫也七戰皆獲  
死於牖下有馬七乘見

在單豹巖居逢於菟十殺一人歟相戒飲食牀第翻畏

途人生福厲那可定趨避益令疑難攄離垢還期効慧

斐劉慧斐號離垢先生構離垢園潔齋修佛得証善果忍欲未得偕林逋姚察讀

經悟空寂姚察姚畏謙之父讀佛經悟一切空寂孝先蔬食沃醞酬徐孝先蔬

食信佛後証果桂父桐君跡有據桂父服桂得仙桐君亦古仙人也金庭石室

途非迂間闕未透成悵望麤鄙不盡增跼蹐右軍游目

眺汶嶺大令鶩羣歸崇虛優劣未可卑餓隸騰舉髣髴

皆仙都自昔文人慧為業於道為近乳酪酥執冊再拜

重請益先生教我當何如

同阮亭先生坐方山司寇匏齋論詩先生遂為書  
古今人名句竟二長幅喜而作歌

彛提先生才調奇風流真具天人姿文章磊落妙一代  
作字更欲追繇羲殘墨如金自珍重豐屋不取珊瑚贄  
貴人往往多責望遷延終以不能辭昨日偶過謝公宅  
琉璃硯匣盤蛟螭先生入門一笑粲高齋茗椀浮春枝  
談藝輒抽簡編亂運腕時見精神披豈因斐几便點綴



恍如練帔呈淋漓  
跂脚飛灑露  
敏妙羣鴻髣髴遊天池  
突兀拙遜冬筍箨  
娟靜細引春蠶絲  
遇情忽迷大人作  
隨意閒寫家風詩  
須臾神明煥兩紙  
歛然修禊山陰時  
春蚓秋蛇態爭出家雞  
野鷺言何卑嗟我貧困走京洛  
身無長物空低垂  
一朝捆載得至寶  
木難火齊勝攜持  
世間耳食那辨此  
公殆天授非人為  
碌碌門簿廢時日  
今朝不負千秋期  
歸來什襲竢終古  
會有後日揚雲知

祖龍行

鍾山已鑿紫塞崇鱗鱗日照阿房宮芙蓉銷盡金人氣  
寶歷從此垂無窮靈藥迢迢問東海千秋萬歲期常在  
此生不擬禪扶蘇那知身後防胡亥昨日徐郎有報書  
帆檣將近羽人都何事君王不相待輜輶東來雜鮑魚  
却怪宮妃未偷藥至今猶挽蓮花索

鄉寧山城即景

山雲啓新霽林屋含清暉風吹兩黃蝶時繞山樓飛老  
農向煙且驅犢溪女背人猶浣衣

次青縣題壁

去年九月長安來鯉魚風起船旗開今年三月舊山去  
馬上綠楊掠飛絮舊山風景復何如昨日家人有報書  
當門萬里崑崙水千點桃花尺半魚

簡謝趙章侯將軍立春日招飲

今日立春春已入簷際春風便習習將軍高宴啟轅門  
斫鱸燔熊衆賓集當筵百戲間瑤笙急管繁絃繞畫屏  
玉瓚頻傾千日酒金盤真壓五侯鯖將軍名閥湖山上

玉季金昆坐蓬閣氣懾千夫意不驕書探萬卷神方王  
秋來秉鉞大河濱蟠花錦映玉麒麟說禮敦詩本儒者  
輕裘緩帶真天人繫余珠幢瞻紫氣為君揖客增欣慰  
豈但投壺致倍高更看結襪風猶貴今日之樂樂如何  
千觴在御歡情多願持幕府霜毫筆寫入軍中朱鷺歌

酬贈郭乾為時同客西谷侍御使院

淮海郭公來夏五使院相逢觴屢舉文章不減徐常侍  
腰腹大類庾開府酒後常時舞鴈鵠筵前即可賦鸚鵡

開口便能取富貴立談早已驚公輔其如文戰久不利  
尚爾遲回困環堵跛驢大笑走南北行卷沈吟閱寒暑  
來年決定奪錦標一鏃三重洞鐵鼓嗟我垂老百無為  
圖養八口少百畝衣穿剩有皮骨存履破難以干將補  
不思仙侶追鷓鷯但析田舍迎貓虎賴有彭城柱史賢  
天涯能念金蘭譜與君同味學士鹽青眼可以計出處  
君自青雲我白雲虔拜木公謁金母待爾功成身退時  
相尋再與商終古

題遂閒堂趙松雪畫圖

憶昔驅車北平道停車特謁夷齊廟階下偃松亦太竒  
就地蟠拏助清嘯今日堂中作畫看吳興妙手寫生難  
更畫柴桑老處士歸來獨撫恣盤桓堂上主人柴桑客  
官職不同性情一歸歟久自稱卧松取意何期畫中得  
我來堂上樽酒同海濤髣髴聞天風不須放筆為直幹  
且看隨地蟠蒼龍痛飲看圖還一笑笑問堂中卧松老  
鷗波筆墨北平安畢竟精神是誰好卧松捧腹當我前

松畫兩皆無間然畫松早寫真松意真松還仗畫松傳  
我對畫松更長喟松畫非一亦非二與其慕直觸風雷  
何如蠖屈留天地此道由來應不窮南華之妙惟環中  
君不見修幹多栽作梁棟丹黃反作山中夢願君看畫  
更懷真休傷材大難為用

題張魯菴方伯清潭印月圖

風潭百頃如傾銀潭上明月如金盆月華瑩澈浸潭底  
如琉璃合無纖痕有人齋心潭上坐心憐淨綠不忍唾

孤情恰與白雲閒萬事都如飛鳥過潭上卉木何紛紛  
青藤紅萼無冬春皎皎方看潭上月兀兀已忘潭上人  
潭上月華潭下水湛然一派空明耳我心正與水月同  
水月與我何彼此嗟余平生心未降水中索月增勞攘  
豈知己為第二月標月之指難禁當先生事事有真契  
語默從來少凝滯即看觸處發天機寫向圖中已餘事  
今日當機惟嗒然清波瀰瀰月娟娟等閒莫向潭中覓  
一月還教遍萬川



題劉鐵龕負劍圖冊子 有序

蓋聞善攝生者陸行不遇兇虎入軍不被甲兵  
兇無所投其角虎無所措其爪兵無所容其刃  
鐵龕志於道久矣豈尚資一劍之利哉然昆吾  
冶鐵炎煙橫飛渾穢盡蠲純鈎乃精淬以鵬鶴  
發為蓮花綠龜威鱗青蛇丟珠陰陽刑德混於  
杳冥舉之無上抑之無下運之無傍漆園不能  
說司空不能窺鐵龕之意將無有取於是乎於  
是劉子倚柱而嘻曰有是哉遂短詠記之以復

劉子

文采帶利劍古人稱盜竽劉子豈其然將轉轆轤珠籀  
冠斜披日本裘背負一段青珊瑚世界不平平心地心

中那有不平事眼底皆付晉人吹筵前肯假公孫器知  
勇為鋒廉為鏑大匠無端代求斲總然千里不留行那  
見龍鳴勝屈蠓寶鼎温温火候勻百鍊搏成無價珍風  
胡無言歐冶死從此蓮花有化身淵默匣中生霹靂負  
之而趨誠有力動靜須教山鬼驚行藏那使天魔識徙  
倚休嗟行路難長空珠斗夜闌干安居始信真無事多  
少癡人畫影看

此身歌東韓元少先生

此身謂非我居然耳目能明聰此身謂真我呼吸不存  
俄生蟲臂彈尻馬寧異說鼃蟻鳩掇捐雷同世人紛紛  
轉茫昧因之蚓竅爭蠅蠊逝者如斯歎川上無言本自  
歸鴻濛明明此意在鄒魯其如雷電乖盲聾雕刻心思  
養口體尋常貪恚成伐攻福輕於羽不知載百年馳驟  
何終窮美食投箸輕萬錢我冠大佩修高容高名厚實  
兩俱得聲華誰敢輕汙隆總使千秋尚餘慮金蠶玉盃  
埋丘壘水銀池沼雜鳧雁可憐長夜魚燈紅以此膠擾

鄙器遲況復先聖多發蒙十年有學願無學相視而笑  
疇堪共先生文章具性道使我捧讀心神融天授鉅手  
闡元化軒轅鏡子懸青銅昨日慈仁一握手果恩薄日  
光玲瓏吉人藹藹見真趣竚令塵土開心胸世間原自  
多上士轉忘纓紱分雌雄長而不宰果何德從斯永擬  
參猶龍

蓮洋詩鈔卷二